

## **13. interparlamentarni sastanak**

**19. i 20. decembar 2011., u Briselu**

### **ZAJEDNIČKA IZJAVA**

#### **predsjedavajućih delegacija**

Po završetku 13. interparlamentarnog sastanka između Evropskog parlamenta i Parlamentarne skupštine Bosne i Hercegovine, održanog u Briselu, 19. i 20. decembra 2011. godine, dvije delegacije su:

1. duboko zabrinute što se ni nakon više od četrnaest mjeseci od izbora u oktobru 2010. godini političke snage nisu sporazumjele o uspostavljanju vlasti na državnom nivou; sa žaljenjem primijetile da su čak i nedavni pokušaji političkih lidera da postignu dogovor propali; pozvale lidere da ulože sve napore kako bi se uspostavilo Vijeće ministara što je prije moguće; podvukle da je formiranje vlasti na državnom nivou bitno kako bi se osigurala efikasna vlast na najvišem nivou, odnosno slijedili izgledni procesi integracija u EU;
2. naglasile nužnost ulaganja istinskih napora u skladu s Općim okvirnim sporazumom za mir u Bosni i Hercegovini kako bi se Ustav uskladio s presudom Evropskog suda za ljudska prava u predmetu Sejdić i Finci, usvojio zakon o državnoj pomoći na državnom nivou kako bi se omogućilo da Sporazum o stabilizaciji i pridruživanju stupi na snagu; ponovile nadu da će predstojeće stupanje na snagu Sporazuma o stabilizaciji i pridruživanju, koji su već ratificirale sve zemlje članice, doprinijeti poboljšanju političke situacije u zemlji;
3. podvukle potrebu da se ojača koordinacija između relevantnih tijela na svim nivoima u sektorima značajnim za preuzimanje zakonodavstva EU; naglasile, u vezi s budućim pregovorima o pridruživanju, nužnost da Bosna i Hercegovina ima kompetentna tijela osposobljena za pitanja integracija u EU u svojim resornim oblastima;
4. primijetile da je Parlamentarna skupština BiH nedavnim pokušajem da se postigne konsenzus o tome kako provesti presudu Evropskog suda za ljudska prava u predmetu Sejdić i Finci, posredstvom Zajedničke privremene komisije, prvi put u potpunosti, samostalno pripremila izmjene Ustava; iako nisu mogli postići saglasnost u vezi s određenim amandmanima, pozdravljaju činjenicu da su predstavnici manjina i

nevladinih organizacija uključeni u raspravu, odnosno da je proces bio otvoren za javnost; izrazile očekivanje da će rad na provođenju presude Sejdić i Finci biti nastavljen što će dovesti do konkretnih rezultata;

5. uzimajući u obzir postojeću saradnju u oblasti evropskih integracija između entitetskih parlamenata i Parlamentarne skupštine BiH, pozvale oba entiteta da sazovu posebnu zajedničku sjednicu entitetskih vlada kako bi se poboljšala njihova koordinacija i sposobnost provođenja reformi vezanih za EU;

6. pozdravile jačanje prisustva EU i imenovanje jednog predstavnika EU za zemlju kao jasnog signala njene privrženosti Bosni i Hercegovini i važnog koraka ka uspostavljanju tješnje i efikasnije saradnje s političkim snagama u zemlji; naglasile da je sada odgovornost na političkim snagama da ulože neophodan zajednički napor kako bi započete reforme bile nastavljene;

7. naglasile da je završetak pregovora Hrvatske o pridruživanju i potpisivanje pristupnog ugovora ohrabrujući signal za cijeli region uključujući i Bosnu i Hercegovinu, te da su vrata EU širom otvorena pod uslovom da svaka zemlja ispuni potrebne kriterije;

8. pozdravile uspostavljanje strukturalnog dijaloga o pravosuđu te izrazile očekivanje da vlasti BiH nastave konstruktivan angažman po ovom pitanju;

9. naglasile da u tom pogledu vlasti BiH moraju razmotriti određen broj praktičnih pitanja – uključujući usklađivanje zakonodavstva BiH s pravnom tečevinom EU u tehničkoj, veterinarskoj i fitosanitarnoj oblasti kao i u oblasti sigurnosti hrane, izgradnji ili unapređenju infrastrukture na nekoliko graničnih prijelaza s Hrvatskom itd. – kako bi se nastavilo održavanje bliskih ekonomskih odnosa s Hrvatskom nakon njenog pristupanja EU; ponovile spremnost EU da pomogne Bosni i Hercegovini u tim nastojanjima;

10. naglasile da se obrazovanje u zemlji suočava s brojnim izazovima kao što je neprovođenje državnog okvirnog zakona i nepotpuna harmonizacija pravnih okvira na nižim nivoima; različiti nastavni planovi u cijeloj zemlji, postojanje jednonacionalnih škola, uključujući i razdvajanje djece na etničkoj osnovi, ograničen pristup obrazovanju djece ranjivih grupa; izrazile ozbiljnu zabrinutost da i ove i druge prepreke ne samo da utiču na kvalitet i troškove obrazovanja nego i narušavaju napore za unapređenje pomirenja u zemlji;

11. primijetile da je liberalizacija viznog režima bila pozitivan korak za Bosnu i Hercegovinu na njenom putu evropskih integracija; ojačala je ne samo političku i ekonomsku saradnju već je i značajno poboljšala kontakt između ljudi i otvorila evropsku perspektivu za mlade; pozdravile pravovremeno i ispravno reagiranje vlasti BiH na nedavno povećanje broja lažnih aplikacija za azil u nekim od zemalja članica EU ohrabrujući ih da nastave ispunjavati obaveze neophodne za sprečavanje zloupotrebe bezviznog režima, jačati graničnu kontrolu i informativnu kampanju za

smanjenje zabrinutosti u nekim zemljama članicama EU u vezi s povremenim dolaskom ilegalnih migranata i azilanata iz zemalja Zapadnog Balkana;

12. primijetile da bezizlazna politička situacija, kao i nedostatak političkog dogovora o pitanju ekonomske i fiskalne politike, a posebno neusvajanje državnog budžeta za 2011. i 2012. godinu, imaju štetan uticaj na ekonomski oporavak zemlje; osim toga, sa žaljenjem su konstatirale da je trenutna politička situacija početkom decembra dovela do smanjenja održivosti kreditnog rejtinga zemlje, što će dodatno komplicirati mogućnosti privlačenja neophodnih direktnih stranih investicija.